

AKASHVANI AIZAWL
REGIONAL NEWS BULLETIN
(MIDDAY)



SUNSET VIEW

Nimin chawhnu a Tourism Minister Pu Lalnghinglova Hmar hova Tourism department officer, Sihphir YMA, Sakawrhmutuai Development Committee leh bbyanimals (event manager) te inhmukhawm chuan naktuka Sakawrhmutuai tlang atanga kum hlui ni tla hnuhnung ber thlirliam tur chungchang an sawiho.

Inhmukhawmna-ah hian Tourism Department buatsaih ‘Sakawrhmutuai sunset view’ huaihawt tur chungchanga inbuatsaihna kal mek leh hmabak te ngaihthlak a ni a. Mipui pungkawm tam tura beisei a nih avangin Health & Family Welfare Department atangin medical duty leh police atangin security duty awm tura ruahman a ni. Traffic chungchangah pawh SP, Traffic leh SP, Kolasib te nen tangkawpa ruahmanna mumal tak siam a nih thu tarlan a ni. Sihphir khawtlang hruaitute pawhin phur taka an inbuatsaih thu leh ruahmanna peihfel thawkhat a nih tawh thu an tarlang a. Sakawrhmutuai Sunset hun ruahman pual hian venhimna thawk tura tlawmngaia inpe ni 130 vel an duty dawn a, traffic duty ah mi 70 vel leh, chetsualna thlen thulha che chhuak thei tur response team atan mi 20 vel ruat a training pek an nih thu tarlan a ni.

Tourism Minister chuan Sihphir khawtlang chungah lawmthu a sawi a. Sakawrhmutuai tlang atanga nitla thlirliam hun chu Tourism Department buatsaih ni mah se Sihphir khawtlang in hlawkpui ber se an duh thu tarlangin, Sakawrhmutuai tlang chu khawvel zau zawka tihlar tlaka mawi a nih thu a sawi a ni. Sawrkar department hrang hrangte nen thawhhona tha tak an nei thin chu lawmawm a tih thu a sawi a. A huhova ni tla thlirliam hun hmun hrang hrangah buatsaih an tum thu hriat a ni chu lawmawm a tih thu leh, zinmi tam zawk hip theihna ni a a hriat thu a sawi bawk a ni.

‘Sakawrhmutuai Sunset’ programme hi December 31, 2025 chawhnu dar khat a tan tur niin, a hmunah dawr hrang hrang siam a ni dawn a. Tunlai zaithiam lar tak takte an zai dawn bawk a ni.



ESTHER HNAME

India rama naupang chawimawina sang ber dawngtu Esther Hnamte chu nimin chawhnu khan Pukpui Centenery Lungphunah lo hmuah a ni.

Pukpui atang hian amah hmuaktute’n lirthei chi hrang hrang hmanga kawng zawhpuiin Bullet bike rider 50 rualte’n hma an hruai a, LMC chairman motor-ah chuantirin India rama chawimawina sang ber a dawng thei chu chhuanawm an tih thu aurinna hmanga puanchhuah a ni a. Assam Rifles Band party ten Saikuti Hall kawt atangin kawngzawh hi hma an hruai a ni.

A lawmna Venglai- ah hman a ni a, hetah hian Pu T. Lalhlimpaia MLA, LMC chairman Pu Lalzuithanga, Bawrhsap Pi Navneet Maan leh Assam Rifles Commandant Col. Jaswan Singh ten thu an sawi a. Pu T Lalhlimpaia chuan Estheri a lawmpui thu sawiin a hlawhtlinna hian India mipui tam tak zingah Mizote’n theihna kan nei ve tih a tarlang a ni a ti. Bawrhsap pawhin tun hi a bul tanna nise, tawp lova hma lampan zel turin a fuih. Amah lawmna-ah hian Estheri hian hla 2 a sa a.

Assam Rifle Band party te pawhin chhepchher an tum leh a ni. Lunglei mipui thahnem tak an pungkhawm a, College veng Local Council leh Esther-i pa ten lawmthu sawiin hun khar a ni.



FIRECRACKER

Aizawl district Crime Branch Addl. SP Pu Zoramthara chuan kumin kum hlui thlah zana halpuah/halmawi hal khap chungchanga CYMA nena checking runpui an nei thei chu lawmawm a tih thu a sawi.

He thu hi vawiina Dawrpui Multipurpose Hall a CYMA leh Police tangkawpin Aizawl New Market leh a chhehvela surprise checking neih tur hawnna hunah sawiin kum hmasa lama halpuah/halmawi zawrh khapnaa avanga checking an neihin a puih nasa thu a sawi a. Kumin kumhlui thlah zana khapna thupekin zawm a hlawh dawn leh dawn loh a hriat loh thu a sawi a. Kumin atana checking an neih chhan chu mipuite ah awareness an neih nasat thu a sawi a. Kumin a checking an neih tum dan chuan Police Team 3-ah inthenin Team 1-ah police pahnih zel an ruat a ni, a ti a.

Team 1-na chuan Chanmari atanga Bazar kawng hnuai an hrut dawn a, Team 2-na in Bazar Bungkawn atanga chhuk atangin a hnuai lane an hrut dawn thung a. Team 3-na hian Hospital Road leh a chhehvel an vai dawn a ni a ti a. Police Team te hi CYMA lam atanga thawkchhuak te’n an zui bawk a ni.

